




BUXORO DAVLAT UNIVERSITETI ILMIY AXBOROTI

Научный вестник Бухарского государственного университета
Scientific reports of Bukhara State University

5/2023



5/2023

<http://buxdu.uz>



Хамраев Ю.Ю., Норова М.О.	Об однородных разностных схемах высокого порядка точности для краевой задачи с особенностью	110
TILSHUNOSLIK *** LINGUISTICS *** ЯЗЫКОЗНАНИЕ		
Asadov T.H.	Predmet-belgi ma'noli yasama so'zlar va ulaming lug'atlardagi ifodasi	116
Rakhmatova M.M.	Pragmatic analyses of implicature in the novel "The fault in our stars" by John Green	122
Adizova N.I.	Badiiy matnning lingvostistik tadqiqi va ijodkor uslubi	126
Alisoy H.H.	A comparative study of Lithuanian and old Prussian	133
Boltayeva N.R.	Siyosiy tilshunoslik fan sifatida	139
Axmedov A.R., Hamroyeva M.R.	Badiiy asarlardagi antroponimlarning lug'aviy qatlam masalasiga doir lingvistik tahlil va xulosalar	144
Mamaraximov S.	Leksemalarning barqarorlashishi hamda nutqiy ma'noning lisoniyashuvi	149
Mamatqulov A.	O'zbek tilida so'z yasalishi Azim Hojiyev nazdida	153
Mardonova S.O.	Muallif nutqi metaforalarining struktur-semantik tabiat xususida (U.Azim she'riyati misolida)	157
O'razov A.D.	Tog'ay Murod asarlarida evfemizmlar va disfemizmlardan foydalanish mahorati	161
Исақова З.З.	Тилшуносликдаги баҳо семантик категорияси ва ёндош семантик ҳодисалар	165
Шарипов Ж.	Сўз ясашда лисоний ва нолисоний омиллар	170
Шарипов Ф.Г.	Морфологик луғатларнинг яратилиши – янги амалий босқич калити	175
Saidov S.S.	An overview of corpus linguistics and its benefits in language teaching	180
Babayev M.T.	Nemis va o'zbek tillarida evfemizmlarni qiyosiy o'rghanish	185
Niyozova Sh.T.	The contrastive analysis and research of national specificity of phraseological semantics	193
Seyidov R.R.	Effective approaches for teaching arabic: a comprehensive guide to enhancing language instruction	197
Abatov D.R.	Antroponimik indikatorlar va ularning xalq dostonlari matnida qo'llanishi (Qashqadaryo xalq baxshilar dostonlari misolida)	209
ADABIYOTSHUNOSLIK *** LITERARY CRITICISM *** ЛИТЕРАТУРОВЕДЕНИЕ		
Annaxasanova I.B.	Analysis of scientific works on studies of Alisher Navoi in Russian orientalism in the XX century	213
Fozilova O'.F.	Firdavsiyning "Shohnoma" asarida navro'z va unga doir tushunchalarning yoritilishi	217
Jabbarova M.X.	Gi de Mopassan va Abdulla Qahhor asarlarida ayol obrazidagi ruhiyat tipologiyasi	223
Khabibova M.N.	Jeyms Joysning adabiy uslubi va asarlaridagi epistolyar texnika	229

PREDMET-BELGI MA'NOLI YASAMA SO'ZLAR VA ULARNING LUG'ATLARDAGI
IFODASI

Asadov To'lqin Hamroyevich,
Buxoro davlat universiteti,
O'zbek tilshunosligi va jurnalistika
kafedrasi dotsenti, f.f.n.

Annotatsiya: Mazkur maqolada ot va sifat yasashda ishtirok etadigan predmet-belgi ma'noli affikslar, ularning nazariy manbalardagi tadqiqi, grammatik tabiat, so'z yasashdagi imkoniyati, shu affikslar so'zlarning lug'atlardagi ifodasi keng izohlangan, munosabat bildirilgan va misollar bilan dalillangan.

Kalit so'zlar: predmet ma'noli so'z, belgi ma'noli so'z, ot, sifat, affiks, ma'noviy farq, so'z turkumi, lug'at, faol so'z yasalish, nofaol so'z yasalish.

ПРОИЗВОДНЫЕ СЛОВА С ПРЕДМЕТНО-ЗНАКОВЫМ ЗНАЧЕНИЕМ И ИХ
ВЫРАЖЕНИЕ В СЛОВАРЯХ

Аннотация: В данной статье широко объясняются аффиксы с предметно-знаковым значением, участвующие в образовании имён существительных и прилагательных, их исследование в теоретических источниках, выражается и доказывается примерами их грамматическая природа, возможность образования слов, выражение слов с этими аффиксами в словарях.

Ключевые слова: слово с предметным значением, слово со знаковым значением, имя существительное, прилагательное, аффикс, семантическое различие, часть речи, словарь, активное словообразование, пассивное словообразование.

DERIVATIVE WORDS WITH OBJECTIVE-SIGN MEANING AND THEIR EXPRESSION
IN DICTIONARIES

Annotation: In this article, affixes with subject-sign meanings involved in the formation of nouns and adjectives are widely explained, their study in theoretical sources, their grammatical nature, the possibility of forming words, the expression of words with these affixes in dictionaries is expressed and proved by examples.

Key words: word with objective meaning, word with sign meaning, noun, adjective, affix, semantic difference, part of speech, dictionary, active word formation, passive word formation

Kirish. O'zbek tili "so'z yasalishi" bo'limida bir qator affikslarning ham predmet (ot), ham belgi (sifat) ma'noli so'zlar yasay olishi haqidagi bayon (fikr-mulohaza)lar mavjud. O'zbek tili grammatisiga oid asarlar [15;18;19], xususan, o'zbek tili leksik qatlamidagi so'zlarning shakliy tarkibi [25], so'z yasalishi [5;6] ga tegishli manbalar buni dalillaydi.

Asosiy qism. O'zbek tilida so'z yasash imkoniyati u yoki bu darajada bo'lgan quyidagi (unumli-unumsiz) affikslar predmet-belgi ma'noli ot va sifat so'zlar yasashda (omonim affiks sifatida) ishtirok etadi: -a (yara, g'arg'ara; ko'tara savdo, qo'sha-ko'sha uy), -ak (qarsak, g'ijjak; qirmizak, g'alvirak), -boz (bedanaboz, kaptarboz; qog'ozboz, arizaboz), -bon (darvozabon, zindonbon, kishanbon), -gar (misgar, sovungar; hiylagar, firibgar), -gich (suzgich, purkagich, ko'targich; bilgich), -don (surmadon, guldon; bilimdon, qadrdon), -dor (chorvador, amaldor; go'shtdor, kungurador), -dosh (sinfdosh, vatandosh; dildosh, fikrdosh), -(u)k (ko'rik, ko'pik; egik, chirik), -ildoq (shilpildoq, hinqildoq; po'rsildoq, shaqildoq), -iq (chopiq, chiziq, tortiq, qiliq; yoyiq, bo'liq, to'liq), -im (bilim, kiyim; siqim, ayrim), -in (yog'in, yig'in, ekin; chirkin, sog'in sigir), -kash (aravakash, mehnatkash, qalamkash; dardkash, xayolkash), -kor (sholikor, qalampirkor; savolkor, ta'zimkor), -ma (bostirma, tugma; qaynatma, ko'tarma), -oq (boshoq, o'roq; qoloq, baqiroq), -ch (ishonch, quvonch, ayanch; jirkanch, tinch), -chi (suvchi, gulchi; a'lochi, ikkichi), -qisq (suvoq, chiziq, chanqoq; porloq, titroq), -g'in (yong'in, quvg'in; ozg'in, so'lgin) va b. Mazkur affikslar bilan hosil bo'lgan ko'pgina so'zlarga bugungi kun nuqtayi nazaridan, albatta, tarixiy so'z yasalish qolipi hosilalari sifatida qarash to'g'ri bo'ladi. Ma'lumki, so'z yasash qolipi hosilalari miqdori, bu hosilalarning aniq ma'nolari lug'atlar orqali belgilanar ekan, muayyan bir affiks yangi-yangi so'z hosil qilmas ekan bunday so'z yasash qolipi unumsiz hisoblanadi [13,43].

LINGUISTICS

Tahlilga tortilgan yuqoridagi kabi so'zlarning "predmetlik" yoki "belgilik"ka munosabati masalasi alohida kuzatishga zarurat sezadi. Bu kabi yasama so'zlarni dastlab ikkiga bo'lib tasnif etish mumkin:

1) predmetlik va belgilik ma'nosi to'liq farqlanadigan so'zlar (chunonchi: *surmadon*, *guldon*, *tuzdon* – ot turkumi; *bilimdon*, *qadrdon* so'zları – sifat turkumiga xos)

b) predmetlik va belgilik ma'nosi qisman farqlanuvchi yoki umuman farqlanmaydigan so'zlar (chunonchi: *arizaboz*, *fikrdosh*, *dilkash*, *puldor*, *mehnatkash*, *javobgar*, *ig'vogar*, *gumondor*, *pastkash*, *omilkor*, *maslakdosh*, *yollanma*, *hovliqma* va h.k.) Ko'rinib turibdiki, 2-guruh so'zlarining ot yoki sifatligini farqlovchi aniq ma'noviy omil yo'q. Vaholanki, manbalarda ular ba'zida ot, ba'zida sifat deb izohlanadi.

Aytish o'rinniki, predmetlik, belgilik ma'nolarining borliq va uning in'ikosi bo'lган tildagi o'zaro munosabatlari dunyo tilshunosligida faylasuf va tilshunoslarning doimiy kuzatish obyekti bo'lib kelgan. Bu kabi ma'nolar barcha mustaqil so'z turkumlarida turli darajalarda bo'la oladi. Biz bu o'rinda ot va sifat doirasidagi predmet/belgi ma'noli qo'shimchalarni tahlilga tortishni ko'zladik.

Aslida, predmetlik ma'nosi otlarda yorqin, sifatlarda kuchsiz holda kuzatiladi, shu sababli ba'zida ot va sifatlarni so'z turkumlikka ko'ra farqlash qiyin kechadi. Yoki o'zbek tilida belgilik ma'nosi nafaqat sifat, ravish so'zlar yoki grammatik shakllar bilan, balki prof. H.Ne'matov, O.Bozorov I.Madrahimov, B.Mengliyev, J.Eltazarov, N.Shirinova tadqiqotlarida ko'rsatilganidek turli sintaktik birikuvlarda kelgan fe'l (shakllari), ot, son, taqlid so'z, olmoshlar bilan ham bermalol ifodalanishi mumkin[3;4;8;11;12;26]. Aslida, ot va sifatlarning yondosh holdagi taraqqiyoti, faoliyati bu turkumlarda o'zaro "tabiat almashishi"ga sabab bo'lgan. Bunday holat barcha turkum so'zlarida kuzatilishi mumkin. Bu tabiiy jarayon bo'lib, ularning turkumlik jihatdan turg'unlashishi (qat'iylashishi) muayyan bir davr (ijtimoiy tuzum) bilan ham bog'liq. Qolaversa, mazkur holat til va nutq differensiyasi, so'zning til va nutqdagi o'mi[12;14], predmet-belgi ma'nosining gradual munosabatlar, gradual tilshunoslik tahlil usullari[3], morfologik vositalarning nutqdagi ma'noviy va sintaktik imkoniyatlari[11], so'zlarning tasniflashi[7;8], so'z turkumlaridagi o'zaro aloqa va ko'chish (konversiya) hodisasi[4], predmet/belgilik ma'nolarini farqlovchi vositalari[26] kabilar bilan ham belgilanadi.

Premetlik va belgi-xususiyat farqlanishini maxsus o'rgangan tadqiqotchi N.Shirinova ta'kidlaganidek "...borliqdagi predmetlik va belgi-xususiyat sinkretizmi tilda ham o'z aksini topmasdan qolmaydi, lisoniy tizimda predmetlikni alohida, belgi-xususiyatni alohida ifodalovchi vositalar bilan birga predmetlik ma'nolarida belgi xususiyat ma'nolarini kuchaytiruvchi va aksincha, belgi-xususiyat ma'nolarida neytrallashtiruvchi, birlashtiruvchi usul hamda vositalar mavjud"[26,10]. So'zlarni turkumlashda ulardagi umumiy va xususiy tabiiy belgilar ("turkumlik ma'nosi" – A.Hojiyev) ga tayanib ish tutish so'zni izchil tasniflash, ma'lum bir turdag'i guruhga ziddiyatsiz ajratish imkonini ham beradi. Shunday dialektik tamoyillar asosida ajratilgan so'z turkumlarida ularning o'zaro munosabati – bog'lanishi, o'xshashligi va farqi o'z aksini topgan bo'ladi.

Predmetlik, belgilik ma'nosiga ko'ra qisman farqlanuvchi ot va sifat yasovchi affikslarga -boz, -gar, -dor, -dosh, -kash, -kor, -ma, kabilar mansub bo'lib, lug'atlarda[16;20;21;22;23;24] o'z ifodasiga ega bu kabi affiksli yasama so'zlarda a) predmetlik(ot), b) belgilik(sifat), v) predmet-belgilik (ot+sifat) tabiat kuzatiladi. Ko'rsatilgan affikslarda predmetlik va belgilik ma'nosi sinkret tarzda kuzatiladi. Mazkur affiksli so'zlarining shu nuqtayi nazardan yondashilgan tasnifini quyidagicha keltirish mumkin:

-boz/voz affaksi. O'zbek tili lug'at qatlamida -boz affaksi bilan yasalgan 50 dan ortiq so'z keltirilgan[16,51-52]. Bu so'zlarni ma'no ifidasiga ko'ra:

1. Predmet ma'nosi birlamchi so'zlar (PMBS): masxaraboz, dorboz, qilichboz, qimorboz, askiyaboz,
2. Belgi ma'nosi birlamchi so'zlar (BMBS): qofiyaboz, nazmboz, atomboz.
3. Predmet-belgi ma'noli sozlar (P-BMS): arizaboz, guruhboz, qog'ozboz, kaptarboz, lo'ttiboz va b. kabi turlarga bo'lib o'rganish mumkin.

Ayrim misollarni kuzatamiz: *Shu mo'jaz hayotimda ko'rdim goho lo'ttiboz*, *Ko'rdim goho she'rfurush, goho sur, mansabfurush*. (A.Oripov) Bir oy o'tar-o'tmas tappa-tuzuk bedanaboz bo'ldi-qo'ydi. (S.Nurov) *Sen, bolakay, qaytishda anavi kaptarboz bolani ham oldingga solib kelgin*. (H.Nazir)

-dor affksi. Ters lug'atda bu affiks bilan yasalgan 140ga yaqin so'z keltiriladi[16,142-143]. Fors-tojik tilidan o'zlashgan -dor affiksli so'zlarning bir qismi boshqa o'zlashma affiksli so'zlar kabi shu o'zlashma so'z tarkibi bilan birga kirib kelgan. -dor affiksli so'zlarning katta qismi belgi ma'noli so'zlar hosil qilishi aytildi[5,57-62]. Aslida ham mazkur affiksning o'z qatlami (fors tili) dagi tabiat [25,413] uning belgi ma'noli so'zlarni hosil qilishga moyilligi yuqori ekanligidan dalolat beradi. O'zbek tili lug'at qatlamidagi *mulkdor*, *do'kondor* kabilar til rivojining keyingi davrlaridagina shaxs oti bo'lib turg'unlashdi. Lug'atlarda mavjud -dor affiksli so'zlarni predmetlik yoki belgilik tabiatiga ko'ra quyidagicha tasniflash mumkin:

1. PMBS: chorvador, bayroqdar, hukmdor, do'kondor, muhrdar, xaridor.

2. BMBS: *guldor*, *go'shtdor*, *unumdor*, *mehmondor*, *rozg'ordor*, *zotdor*.
 3. P-BMS: *puldor*, *homilador*, *yarador*, *aybdor*, *gumondor* va b.
-gar affiksi. Lug'atda -gar affiksi bilan hosil bo'lgan o'ttizdan 30 dan ortiq so'z keltiriladi[16,136]. Bu so'zlarni predmet- belgiga munosabatiga ko'ra:
 1. PMBS: *kimyogar*, *sovungar*, *sehrgar*, *holvagar*, *savdogar*, *zargar*, *chilangar*.
 2. BMBS: *jilvagar*, *ishvagar*, *hiylagar*.
 3. P-BMS: *ig'vogar*, *firibgar*, *nag'magar*, *javobgar* va b. tarzida tasniflash mumkin.
-dosh affiksi. Ters lug'atda -dosh affiksi bilan 40 ga yaqin so'z beriladi[16,175]. Bular:
 1. PMBS: *qarindosh*, *sinfidosh*, *kundosh*, *zamondosh*, *yo'ldosh*, *tengdosh*.
 2. BMBS: *ma'nodosh*, *qofiyadosh*, *asosdosh*, *ohangdosh*.
 3. P-BMS: *undosh*, *chegaradosh*, *qardosh*, *qondosh* va h.k.
-kash affiksi. Lug'atda -kash affiksi bilan 50 ga yaqin so'z mavjud[16,44]. Mazkur so'zlarning ko'pida "predmetlik" ustunlik qiladi:

1. PMBS: *zahkash*, *aravakash*, *xaskash*, *suratkash*.
2. P-BMS: *pastkash*, *zahmatkash*, *mehnatkash*, *jafokash*, *dilkash*, *janjalkash*, *hazilkash*, *tarafkash*, *jonkash* va b.

-kor affiksi. Lug'atda bu affiks bilan aloqador 60 dan ortiq so'z berilgan[16,144-145]. Mazkur so'zlar tabiatini quyidagicha:

1. PMBS: *g'allkor*, *paxtakor*, *bastakor*, *sholikor*, *ijodkor*, *binokor*.
2. BMBS: *mo'jizakor*, *tillakor*, *bahorikor*, *tezkor*, *devkor*, *omilkor*, *zulmkor*, *fidokor*, *isyonkor* va h.k.

-ma affiksi. Bu affiks so'z yasashda sermahsul bo'lib, ters lug'atda 116 ta so'z mazkur shakl bilan bog'liq[16,21-23]. A.Hojiyevning "O'zbek tili so'z yasalishi tizimi" kitobida -ma affiksi ham ot, ham sifat yasashda mahsulli ekanligi, birgina ot turkumiga oid 100 ga yaqin so'z mavjudligi aytildi[6,81]. Qiyoslaymiz:

1. PMBS: *atama*, *yo'qlama*, *tenglama*, *qoplama*, *tirkama*, *chizma*, *jamg'arma*, *qotishma*, *cho'kma*, *eritma*, *isitma*, *otishma*, *damlama*.
2. BMBS: *ulama* (soch), *aylanma* (yo'l), *osma* (chiroq), *ag'darma* (etik), *quyma* (oltin), *qotma* (yigit).
3. P-BMS: *qiyma*, *qochirma*, *ezma*, *uchirma*, *qichima* va b.

Predmet-belgi ma'noli so'zlarni xuddi shu tarzda izohlashimizga quyidagilar asos bo'la oladi. Buni -dor affiksli yasama so'zlar orqali kuzatamiz: 1) birinchi guruh (PMBS) so'zlari hech qanday sifatlovchisiz yakka holda qo'llana oladi. 2) ikkinchi guruh (BMBS) so'zlari (*guldor*, *go'shtdor*...) qo'llanishda sifatlanmishga zarurat sezadi: *Sopi guldor pichoq*. 3) uchinchi guruh (P-BMS) so'zlari (*puldor*, *gumondor*, *aybdor*, *homilador*...)ning matn bilan bog'li holda ba'zida predmetlik, ba'zida belgililik ma'nosi "bo'rtib" namoyon bo'ladi, bunda nutqiy vaziyatiga qarab ot yoki sifat deb baholanadi. Predmet-belgi ma'noli bu kabi "oraliq so'zlar" yakka tarzda (ellipsis hodisasi doirasida) ham, sifatlovchi+sifatlanmish xarakterida ham keladi: 1.*Puldor odam – qanotli odam*, bu qanot bilan mag'ribdan mashriqqa uchasan, har yerda oshna-og'ayni, do'st-yor topasan. (Oybek) 2.*Puldorlar har bir narsani o'z vaqtida g'amlab, arzonga tushirishadi*. (Oybek).

Ma'lumki, ellipsis hodisasi tildagi lingvistik iqtisod – lisoniy tejamkorlik tamoyili asosida voqelanadi[10]. Xuddi shu nuqtayi nazardan 2-kontekstdagi bog'liqlik *odam* so'zining ellipsislashishga to'la imkon yaratgan. Natijada "belgilik" susayib "predmetlik" bo'rtgan.

O'zbek tilining izohli lug'ati'da predmet-belgi ma'noli -dor affiksli so'zlarning izohlanishi e'tiborni tortadi:

I. PMBS izohi: 1.Chorvador. Chorvachilik bilan shug'ullanuvchi kishi[23,509] 2.Aksiyador. Aksiyalar egasi; undan foydalanuvchi jismoniy yoki yuridik shaxs; aksiyadorlik jamiyatni a'zosi[20,65]. 3.Sarmoyador. Katta sarmoya egasi[22,451]. 4.Bog'dor. Bog' egasi; bog'bon[20, 350]. 5.Hissador. Hissa qo'shgan, pay kiritgan sherik[24,538]. 6.Mulkdor. Mulk subyekti, mulk obyektiga egalik, ...jismoniy yuridik shaxs; katta yer egasi, zamindor[21, 634].

II. P-BMS izohi: 1.Yarador. Jarohat olgan, jarohati bor; yarali. *Yarador saldat*. [24,116]. 2.Taqvodor. Mustahkam diniy e'tiqodli, xudojo'y, dindor; harom-harishdan hazar qiladigan, o'zini saqlaydigan, tiyadigan, pok[23,35]. 3.Gumondor. Biror kimsa yoki narsadan gumon, shubha qiluvchi, shubhalanuvchi[20,524]. 4.Mansabdor. Biror mansabga, lavozimga ega bo'lgan; amaldor[21,539]. 5.Puldor. Ko'p pulga ega bo'lgan, puli ko'p[22,320].

Kuzatishlar ko'rsatadiki, -dor affiksli predmet yoki belgi ma'noli leksemalar ma'no-ifodasi sharhida lug'at tuzuvchilar so'zning grammatik ma'nosiga ham u yoki bu darajada ahamiyat qaratadi. Lug'atda predmetlik (shaxs oti) ma'nosi ustuvorlik qilsa, shu so'z so'ngida "shaxs", "kishi", "egasi" kabi

birliklardan foydalanishgan (jumladan: *arizaboz* – “*ariza yozishga berilgan shaxs*”), belgilik ma’nosи ustuvorlik qilsa (jumladan: *hiylakor* – “*hiyla ishlatishga usta, hiyla bilan shug’ullanuvchi*”, *pastkash* – “*arzimagan narsaning ham yuziga boradigan, arzimas narsalarga ham o’zini uradigan, nazari past*” tarzida) “-(u)vchi, -gan affiksli birliklar” bilan qo’llangan.

Umuman, predmet-belgi ma’noli muayyan bir so’zning ot bo’lib turg’unlashishi yoki sifat turkumiga siljishida muayyan bir qonuniyat mavjud emas, bu tilning ijtimoiyligi bilan bog’liq. Masalan, ijtimoiy tuzumning ma’lum bir tarixiy davrida, oktyabr to’ntarishidan oldingi davrida, maktab-maorif sohasida xususiy maktabi bo’lgan shaxs *maktabdor* deyilgan, demakki, davr nuqtayi nazaridan bu so’z shaxs oti sanalgan. Sobiq ittifoq davrida bu faoliyat turiga to’siq qo’yilgach mazkur so’zning iste’mol doirasi ham keskin cheklanib, qisqa vaqtda tarixiy so’zga aylandi. Bu so’z shu kasb egalari faoliyatining rivoji bilan bog’liq holda yana “jonlanib” shaxs oti guruhidan o’rin egallashi mumkin. Predmet-belgi ma’noli *nag’magar* so’zi borasida ham shu kabi fikrni aytish mumkin. Bu so’z tarixda sozandalik, musiqa bilan shug’ullanuvchi kash egasining nomi bo’lgan [21,30]. *Nag’magar* so’zi keyinchalik (XIX asr II yarmidan boshlab) *aktyor* so’zi bilan atala boshlandi. Natijada -gar affiksining grammatic tabiatiga uyg’un holda belgi ifodasi uchungina qo’llanadigan so’zga (masalan: *nag’magar odam, nag’magar bola* va b.) aylanib qoldi. Demak, *nag’magar* so’zida dastlabki davrda predmetlik (*shaxsga ishora*) mavjud bo’lgan bo’lsa, bugungi kunda mazkur so’z belgi ifodasi uchun qo’llanadi. So’z ma’no ifodasida kuzatiladigan bu holat davomiy kechadi, shu sababli izohli lug’atlar ham tez-tez yangilanib turishga ehtiyoj seziladi.

Ta’kidlash lozimki, so’zlarni izohlash jarayonida yasama so’zlarning ixtisoslashgan ma’nolarini ham e’tibordan chetda qoldirmaslik lozim. Leksema hosil bo’lishining bir usuli sifatida talqin etiladigan mazkur hodisa oz sonli ishlarda tadqiq etilgan[2;9;13]. Bilamizki, ko’pgina yasama so’zlarda “tarixan yasama bo’lgan leksema ma’nosining so’z yasash qolipi ma’nosidan uzoqlashishi, ixtisoslashishi”[13,44] yuz bergan bo’ladi. O’zbek tilshunosligida so’z turkumlari chegarasi bilan bog’liq muammolarning bir qismi fanda ixtisoslashish, atamalashish [13,45] hodisasi inobatga olinmaganligi bilan ham bog’liq. Bu kabi shaklan va mazmunan mustaqil bo’lgan, yaxlitlangan, ixtisoslashgan ma’nodagi so’zlarni lug’atchilar alohida so’z sifatida izohlashi lozim bo’ladi. Chunki nutqiy birlikning lisoniyashish bosqichiga o’tishi (masalan: shaxs oti va ismi foillarni ajratish) tamoyili [17], bunda ma’noviy ixtisoslashuv ro’y berishi kabilarni inobatga olish lug’atchilar oldidagi mas’uliyatlardan biri sanaladi. Biroq mazkur hodisalarini inobatga olishda izohli lug’atlarda yakdillik mavjud emas. Masalan, predmet-belgi ma’noli *gumondor* so’zining ixtisoslashgan, ya’ni huquqshunoslik termini sifatidagi ma’no ifodasi “O’zbek tilining izohli lug’ati”da kuzatilmaydi. *Gumondor* so’ziga nisbatan “biror kimsa yoki narsadan gumon, shubha qiluvchi, shubhalanuvchi” tarzidagi ifoda mavjud [20,524]. Xuddi shu so’zga shaklan va mazmunan yaqin “aybdor” so’zining izohlanish tartibi esa batamom o’zgacha [20,51]. Bunda *aybdor* so’zining dastlabki ma’nosи hamda asl ma’nodan uzoqlashgan (yaxlitlangan) fanni termini sifatidagi ixtisoslashgan ma’nosи alohida-alohida, batafsil berilganligiga guvoh bo’lamiz: 1. **Ot. Ayb** ish qilgan kishi; gunohkor. 2. **Ot, huq.** Jinoiy ish qilgan, qonunga xilof ish qilgan, jinoiy javobgar kishi. 3. **Sft.** Jismoniy jihatdan kamchiligi, nuqsoni, illati bor, aybli. Ko’rinadiki, lug’atda predmet-belgi ma’noli “oraliq ma’noli” so’zlarni izohlashda uyg’unlik mavjud emas.

Lug’atda predmet-belgi ma’noli yasama so’zlar ma’no izohiga ko’ra talqinida uch holat kuzatiladi. Bir guruh so’zlar (*arizaboz* [20,97], *qog’ozboz* [24,358], *qofiyaboz* [24,349] va b.) *shaxs* oti sifatida belgilansa, yana bir guruh (2-guruh) so’zları (jumladan; *ig’vogar* [21,265], *hiylakor* [22,30], *nag’magar* [22,30]) ni turkumlik jihatdan baholashda, lug’atchilar qiyinchilik sezishgan va buning yechimini *shaxs* so’zini qavs ichida berish bilan hal qilmoqchi bo’lishadi. Kuzatamiz: *ig’vogar* – *ig’vo bilan shug’ullanuvchi, ig’vo tarqatuvchi (shaxs) kabi*. Lug’atda yana bir guruh (3-guruh) so’zlar (*pastkash* [22,235], *fidokor* [23,343], *yollanma* [21,32]) izohida turkumlik masalasi ochiq qoladi.

O’zlashma (fors-tojikcha) affiksli predmet-belgi ma’noli o’zbekcha yasama so’zlarni turkumlashda ularagi affikslarning o’z tili qatlamidagi grammatic tabiatini bilan hisoblashish ham ayrim chalkashliklarni yoritishda yordam berishi mumkin. Chunki ularning (jumladan: -boz – “o’ynovchi, o’ynamoq”, -gar – “ish, faoliyat; qilmish, xatti-harakat”, -dor – “ega bo’luvchi; saqlovchi, qo’riqlovchi”, -kash – “tortmoq, chekmoq”, -kor – “ish; mehnat, faoliyat, qilmish, xatti-harakat”) asl tabiatini o’zbek tilida doim ham yorqin ifodaga ega bo’lavermaydi.

Predmet-belgi ma’noli affikslarning so’z yasashdagi unumli-unumsizligi turli darajada. O’zbek tiliga oid materiallar (badiiy asar namunalari)ni kuzatish orqali predmet-belgi ma’noli affikslarni unumli-unumsizligiga ko’ra uchga bo’lib o’rganish mumkin: a) unumli affikslar: *-kor, -dosh, -boz/voz*; b) o’rta

¹ Qarang: N.Mahmudov, A.Madvaliyev. So’z yasovchi va shakl yasovchi qo’shimchalarning izohli-illyustrativ ko’rsatkichi. Ўзбек тилининг изоҳли лугати. 5-жилд. – Т.: Ўз.милл.энкц. 572-591-6.

LINGUISTICS

unumli affikslar: *-bon*, *-gar*, *-don*, *-dor*; b) unumsiz affikslar: *-a*, *-ak*, *-gich*, *-(u)k*, *-in*, *-oq*, *-ch*. Unumli affikslar bugungi kunda ham yangi-yangi nutqiy yasama so'zlar yasashda ishtirok etyapti. Misollarni kuzatamiz:

-kor affiksi. Mazkur affiksning faoliyati -zor affiksi kabi, odatda, turli-tuman o'simliklar bilan bog'liq. Masalan, nutqimizda *tamaki* so'zi (o'simlik nomi)ning paydo bo'lishi bilan shu so'z doirasidagi *tamakkor* so'zining yasalishiga zamini yaratdi. Hozirgi kunda *paxtakor*, *sholikor*, *g'allakor* kabi so'zlarning yasalishi me'yoriy hol bo'lsa, vaqt o'tib *qalampirkor*, *qizilmiyakor*, *soyakor* kabi nutqiy yasama (otlar)lar umumiste'mol birliklariga aylanib boradi.

-kor affiksi sifat yasashda ham ishtirok etyapti, ya'ni [ot+kor=sifat] qolipi faoliyati ham davom etyapti. Masalan: *Tillaring biyrondir*, *tillaring – savolkor*/ *Javob topolmasman – dillarim xira*. (U.Azim) *Dashtaro porlagan ko'shkni, saroymi/ Qoshida ta'zimkor bobo Navoiy*. (T.Axmad)

-dosh affiksi.

To 'yingda to 'ydoshman, tirik yelkadosh,

Degayman, yosh umring o 'ylab, ey qondosh. (A.Oripov)

Ushbu misolda *to 'ydosh* so'zi *yelkadosh*, *qondosh* so'zi qolipida yaratilgan bo'lib, yaqinlik, hamfikrlikni ifodalash zaruratiga ko'ra vujudga kelgan. Xuddi shu qolip hosilasi sifatida Usmon Azim *taqdirdosh* nutqiy yasama so'zini yaratadi:

Taqdirdosh, qiyaldik, axir ikkimiz.

Bu temir iz bilan, temir iz bilan.

Yana bir misol: *Yurakdoshmiz! Biz she'r degan bir balo dardga yo 'liqqanmiz!* (U.Azim)

-boz/voz affiksi. Mazkur affiks, odatda, fors-tojik lug'at qatlamidan yasama so'zlar tarkibi bilan o'tgan bo'lib, o'zbekcha so'zlardan oz miqdorda yangi so'z yasashi aytildi. A.Hojiyev -boz, -navis, -xon, -paz, -do'z, -boz shaxs oti yasovchi affikslari qatori -boz shaklini ham yangi so'z yasay olmasligini, bu affiks deyarli mahsulsiz ekanligini ta'kidlab o'tadi[6,75]. Biroq o'zbek adabiyoti namoyondalari ijodini kuzatish davomida guvohi bo'lamicki, -boz affiksi bilan bir-ikki emas, balki o'nlab so'zlar yasalishi uchraydi. Shuning o'ziyoq -boz affiksi haqida aytilgan fikrlarni rad etadi. (Jumladan: 1.*Men shoir emas, men nazmboz kosib/ She'rim shuhratimga emas munosib.* (M.Yusuf) 2.*Ko 'nglimni ozdirdi ko 'ngilbozliklar/ Izladim/ Ko 'ngildan ko 'ngil uzmadim.* (B.Fazliddin) Ko'rindiki, [ot+boz] qolipi faoliyati davom etib kelyapti. Buning natijasida yangi-yangi mualif neologizmlari paydo bo'immoqda[1,31].

Eslamasa nima, men bir to 'pori,

Qishloqi so 'zbozni, osmon yiqilmas. (M.Yusuf)

Xulosa. Xullas, predmet-belgi ma'noli so'z yasovchi affikslarning tabiatini, bu so'zlarning manbalarda, xususan, lug'atlardagi ifodasini kuzatish orqali quyidagicha xulosalarga kelish mumkin:

1. Ot va sifat doirasidagi so'z yasovchi qo'shimchalar ma'noviy, vazifaviy tabiatiga ko'ra a) predmetlik; b) belgilik; d) sinkret tarzidagi predmet-belgilik ko'rinishida bo'ladi. Bu turkumlardagi ayrim yasama so'zlarda predmet-belgi ma'nosini qorishiq tarzda keladi. Ulardagi predmetlik (ot) yoki belgilik (sifat) ma'nosining turg'unlashishida tilning ijtimoiyligi rol o'ynaydi.

2. Predmetlik, belgilik ma'nosini qisman farqlanuvchi so'zlarning hosil bo'lishi -boz, -gar, -dor, -kash, -kor, -ma kabi affikslar faoliyati bilan bog'liq. Mazkur affikslari so'zlarning bir qismida turkumlik chegarasi mavhum bo'ladi. Ularning matniy ifodasigina turkumlikni belgilashda ko'mak beradi.

3. Predmet-belgili "oraliq" so'zlar grammatik ma'nosini yoritishda, ya'ni turkumlik belgisini ko'rsatishda (izohli) lug'at tuzuvchilar u yoki bu darajada e'tibor qaratganliklari aniqlandi. Lug'atda bu kabilarda predmetlik (shaxs oti) ma'nosini ustuvorlik qilsa, shu so'z so'ngida "shaxs", "kishi", "egasi" kabi birliklardan foydalanishgan bo'lishsa, belgilik ma'nosini ustuvorlik qilganda mazkur so'zlar sharhida -(u)vchi, -gan affiksli birliklar" kabilalar qo'llangan.

4. Lug'atlarda so'zning grammatik ma'nosini izohlash jarayonida yasama so'zning ixtisoslashgan (sohaviy) ma'nosini ham inobatga olish ot va sifat kesishuvidanayi ayrim ziddiyatlarning oldini olishga yordam beradi.

5. Predmet-belgi ma'noli so'z yasovchi affikslardan ayrimlari o'zbek tilida unumli so'z yasashda ishtirok etib kelayotgani hamda mazkur nutqiy yasama so'zlarning ko'pchiligi belgi ifodasi uchun qo'llanayotgani kuzatiladi. Predmet-belgi ma'noli nutqiy yasalmalar lisoniyashish jarayonini kechirgandagina izohli lug'atlarga qamrab olinishi mumkin.

Adabiyotlar:

1. Asadov T., Mardonova S. O'zbek tilida faol so'z yasalishi va muallif neologizmlari. Monografiya. GlobeEdit. 2021.
2. Бегматов Э., Нематов Х., Расулов Р. Лексик микросистема ва унинг тадқиқ методикаси // Ўзбек тили ва адабиёти. –Т., 1989. 6-сон, 36-41-б.
3. Бозоров О. Ўзбек тилида даражаланиш. –Т.: Фан, 1995.
4. Элтазаров Ж.Д. Ўзбек тилида сўз туркumlари парадигмасидаги ўзаро алоқа ва кўчиш ҳоллари. –Т.: Ўзб. милл. энцик., 2006.
5. Ҳожиев А. Ўзбек тили сўз ясалиши. –Т.: Ўқитувчи, 1989.
6. Ҳожиев А. Ўзбек тили сўз ясалиши тизими. –Т.: Ўқитувчи, 2007.
7. Исоқов З.С. Ўзбек тилида сўз туркумларининг ўзаро муносабати ва унда юкламаларнинг ўрни: Фил. фан. номз...дис. автореф. – Фарғона, 2005.
8. Мадраҳимов И. Ўзбек тилида сўзнинг серкирралиги ва уни таснифлаш асослари: Фил.фан. номз... дис. –Т.: 1994.
9. Мадраҳимов И. Ўзбек тили лексемаларининг таркибига доир // Ўзбек тили ва адабиёти. –Т.: 2002. 4-сон, 29-30-б.
10. Махмудов Н. Эллипсис в узбекском языке: АКН. –Т., 1978.
11. Менглиев Б. Морфологик воситаларнинг маъновий хусусиятлари ва синтактик имкониятлари: Фил. фан. номз...дис. автореф. – Т., 1994.
12. Нематов Х. Сўз, унинг тил ва нутқдаги ўрни // Ўзбек тили ва адабиёти. –Т.: 1988. 4-сон, 34-39-б.
13. Нематов Х., Расулов Р. Ўзбек тили систем лексикологияси асослари. –Т.: Ўқитувчи, 1995.
14. Нематов Х., Бозоров О. Тил ва нутқ. Самарқанд-2021.
15. Нурмонов А. ва б. Ўзбек тилининг назарий грамматикаси. – Т.: Шарқ, 2001.
16. Қўнгуров У., Тихонов А. Ўзбек тилининг терс луғати. – С., 1968.
17. Салоев Р. Ўзбек тилида исми фоиллар. Фил. фан. номз...дис. автореф. –Т.: 1995.
18. Sayfullayeva R. va b. Hozirgi o'zbek adabiy tili. – Т.: Fan va texnologiyalar. 2010.
19. Ўзбек тили грамматикаси. I том. –Т.: Фан, 1975.
20. Ўзбек тилининг изоҳли луғати. 1-жилд. – Т.: Ўз.мил.энц., 2006.
21. Ўзбек тилининг изоҳли луғати. 2-жилд. – Т.: Ўз.мил.энц., 2006.
22. Ўзбек тилининг изоҳли луғати. 3-жилд. – Т.: Ўз.мил.энц., 2007.
23. Ўзбек тилининг изоҳли луғати. 4-жилд. – Т.: Ўз.мил.энц., 2008.
24. Ўзбек тилининг изоҳли луғати. 5-жилд. – Т.: Ўз.мил.энц., 2008.
25. Гуломов А., Тихонов А., Қўнғиров Р. Ўзбек тили морфем луғати.–Т.: Ўқитувчи, 1977.
26. Ширинова Н. Ўзбек тилида предметлик ва белги-хусусият маъноларини фарқлаш воситалар. Фил. фан. номз...дис. автореф. – Т., 2010.